

Premissas fundamentalas per structuradas dal di

La regenza recumonda da refusar l'incumbensa parlamentara da deputà Beath Nay (pps Cuira)

■ (mc) Deputà Beath Nay e consegnants proponan en ina incumbensa parlamentara da midar la lescha da scola uschia ch'ina activitad professiunala saja ina premissa centrala per metter a disposiziun structuradas dal di e ch'il pensum da tgira haja da correspunder al pensum da lavur. La regenza propona da refusar l'incumbensa. «Perquai che l'activitad professiunala n'è fin uss betg ina premissa per metter a disposiziun ina plazza da tgira sa mida forsà l'idea raschunaivla da 'famiglia e professiun' en 'famiglia e dapli temp liber senza uffants'», argumentescha Beath Nay (pps Cuira). El propona perquai la suandonta precisaziun dal dretg: En cas da personas ch'educheschian sulettas: p. ex. in pensum da lavur da 40 pertschient dat il dretg da dus dis da tgira. En cas da famiglias cun duas pajas è decisiv il pensum da lavur cumulà minus 100 pertschient: p. ex. partenari X lavura 80 pertschient, partenaria Y 60 pertschient, uschia ch'i resulta il dretg d'in pensum da tgira da 40 pertschient, pia da dus dis da tgira.

Dumber d'assistenza è diminui

Per purschidas renconuschidas en il sectur d'ulteriuras structuradas dal di èsi vegni fatg diever durant l'onn da scola 2013/14 da totalmain 233 107 unitads d'assistenza en 44 instituziuns responsablas per la scola e durant l'onn da scola 2014/15 da totalmain 225 971 unitads d'assistenza en 54 instituziuns responsablas per la scola. Malgrà ch'il dumber d'instituziuns responsablas per la scola cun purschidas renconuschidas è creschì è il dumber d'unitads d'assistenza duvradas en il chantun Grischun sa reduci il segund onn da cumparegliaziun suenter l'entrada en vigur da la lescha davart las scolas popularas dal chantun Grischun dals 21 da mars 2012, scriva la regenza



La regenza refusa in'ulteriura regulaziun da las premissas per pudair far adiever da las structuradas dal di en las scolas popularas. MAD

Tenor l'ordinaziun pon ulteriuras structuradas dal di cumpigliar purschidas da la tgira d'avantmezdi, da la tgira da mezdi e da la tgira da suentermezdi. 52 da las 54 instituziuns ch'èn responsablas per la scola cun ulteriuras structuradas dal di renconuschidas porschan ina tgira da mezdi (130 417 unitads l'onn 2014/15). La gronda part da las instituziuns responsablas per la scola porschan sulettamain la tgira da mezdi e mo en 23 savens plitost grondas instituziuns responsablas per la scola exista ultra da quai in basegn per la tgira da suentermezdi. La tgira d'avantmezdi vegn purschida mo en quatter instituziuns responsablas per la scola.

Tgira da mezdi per motivs geografics

Las scolaras ed il scolar da la gronda part da las instituziuns responsablas per la scola na fan betg diever facultativamain da la purschida da la tgira da mezdi, mabain per

motivs geografics. Saja quai perquai che bleras vischnancas dal chantun na pon betg pli manar in'atgna scola pervia da la diminuiziun da las naschientschas u perquai che differentas vischnancas cumpiglian fracziuns ch'èn per part situadas en moda fitg sparpagliada. Las scolaras ed ils scolar pertutgads van pervia da quai a scola – normalmain cun meds da transport publics – en in lieu central en la val u en la regiun e na pon perquai betg turnar a chasa sur mezdi pervia dal lung viadi da scola u pervia da colliaziuns da traffic disfavourivlas. Plinavant na lavuran bleras personas cun la pussanza dals geniturs betg en lur lieu da domicil e na pon perquai betg esser a chasa sur mezdi. Spezialmain personas che lavuran a temp parzial e che lavuran resp. che ston lavurar mintga di e ch'èn perquai er mintga di dependentas da purschidas d'assistenza na pudessan dentant betg pli far diever da quellas sin basa da la regulaziun proponida

en l'incumbensa Nay. Per scolaras e scolar da lingua estra gidan las purschidas da las ulteriuras structuradas dal di – independentamain dal pensum da lavur da las personas cun la pussanza dals geniturs – ultra da quai d'emprender la lingua e pia da s'integrar en la societad.

Contribuziun chantunala

Tenor l'art. 13 da l'ordinaziun paja il chantun contribuziuns da dus francs per unitad d'assistenza da la tgira d'avantmezdi e da la tgira da suentermezdi e da trais francs per la tgira da mezdi als custs da las purschidas d'assistenza da las instituziuns ch'èn responsablas per la scola. Las instituziuns ch'èn responsablas per la scola ston pajar tenor l'art. 9 da l'ordinaziun ina contribuziun als custs d'almain la medema dimensiun sco il chantun. L'autozza dals custs da las instituziuns ch'èn responsablas per la scola per las purschidas d'assistenza dependa dal

cuntegn da la purschida e variescha perquai fermamain. I po dentant vegnir supponì che tar la gronda part da las instituziuns ch'èn responsablas per la scola vegn la part essenziala dals custs surpigliada da las personas cun la pussanza dals geniturs.

Plitost cas excepziunals

La regenza na po betg excluder che singulas personas cun la pussanza dals geniturs che lavuran mo parzialmain u che na lavuran betg laschan far diever lur uffants da questas purschidas d'assistenza e procuran uschia per dapli «temp liber senza uffants» per ellas sezzas. Sin fundament da la situaziun geografica menziunada en grondas parts da noss chantun e sin basa da la repartiziun dals custs tranter las personas cun la pussanza genitoriala, las instituziuns responsablas per la scola ed il chantun poi dentant vegnir fatg quint ch'i sa tracta qua mo da paucs cas singuls en singulas instituziuns ch'èn responsablas per la scola.

Considerablamein dapli lavur administrativa

Betg d'emblidar è tenor la regenza er la lavur administrativa supplementara considerabla che la realisaziun da la regulaziun proponida en l'incumbensa chaschunass per las instituziuns ch'èn responsablas per la scola e per il chantun. Ils pensums da lavur actuals da las personas cun la pussanza dals geniturs stuessan vegnir registrads regularmain. La controlla da las indicaziuns po – sche in summa – vegnir garantida mo investind bler temp e lavur. En differentas professiuns, branschas e furmas d'engaschament (plazzas a temp parzial, substituziuns, pichet e.u.v.) po il pensum sa midar pliras giadas er entaifer in onn.

Per ils motivs menziunads refusa la regenza l'incumbensa.